

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon i ts'ayéherá kixin tsonohará kuènte tí nkexro xráxín kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uíkonxín konni. Kixin tí nkexro mé k'uíkonni la ko tí nkexro kuákóxin tjani, mé tí nkexro nixja tí tan tsjanjon kjuachón.

² Kjuakoxin ch'án nkexrí kjuák'e ch'án, a ntá kaín tí jeheni k'uíkonni ch'án, mé xikaha chrónkaxínni nkexrí kjuák'e ch'án; a ntá tjakuexinni tí jahará nkexrí tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni.

³ Chrónkaxínni tí nkehe k'uíkonni la ko tí nkehe kuínhinni, kixin kjaxinrá jnkokoá chrókuinkachónkirá éxí tinkáchónkini tí jeheni, éxí tí jeheni jnkokoá tinkáchónkini It'éni Dios la ko tí Xjeen ch'án Jesucristo.

⁴ Mé xikaha ikjinni tí nkehe i, kixin chrókjuintaxín chrókócháhará la ko chrókóchéheni.

Dios mé tí xrohi

⁵ Tí tan i mé Inchéni Jesucristo kjuakohe tí jeheni, a ntá jie tjakoहारáni tí jahará, kixin Dios mé tí xrohi, a ntá kohya ninkehó sítié tí tjen tí jehe ch'án.

⁶ A ntá tí tsontáchroni kixin tinkáchónkini tí jehe ch'án, a ntá naxa ixrini tí ntja sítié, na mé xikaha ch'iani kixin ch'ehyani tí nkehe ntáchroni.

⁷ **A** ntá tí xritjejóni tí t'inkaséyan kixin tí Dios mé jehe ch'án tí t'inkaséyan, na mé xikaha jnkokoá tinkáchónkini ch'án, a ntá tí ijnié Xjeen ch'án Jesucristo mé ts'íjmáxin kaín jie chóntani.

⁸ Tí chróntáchroni kixin ninkehó jie chóntahyani, mé xikaha la jehóni ch'iyeheni asénni, a ntá tí nkehe chaxín la chóntahyani.

⁹ **A** ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jína ch'án la ts'itjáyenhen ch'án kaín jie chóntani la ko sinchetjóáni ch'án kixin kaín tí nkehe jínahya kjuích'eni.

¹⁰ **A** ntá tí tsontáchroni kixin kjuasinhyani ninkehó jie, la éxí chróntáchroni kixin Dios la ch'ia ch'án, a ntá tí xikaha tsixroni la chaxínhya tsík'áyéhēni tí tan kuènte ch'án.

2

Cristo mé tsonixjayákonhēni ch'án

¹ Kíchóni, éxí xjanna t'íkuañ tí jahará, a ntá tjékjian tí xroon ts'ayéhérá tsochrónka kixin chrókjuásinhyará jie. **A** ntá tí jnkojínrá chrókjuásinrá jie la chóntani ijnko nkexro tsonixjayákonhēni nkayakon It'ēni Dios, tíha mé Jesucristo, la jehe ch'án mé ijnko nkexro jína.

² Jesucristo mé k'uenyákonhēni ch'án kixin tí jie chóntani; a ntá jehya ijieni ó. Náhi. Ijie kaín chojni siín chjasintajni.

³ Tí tsitekaonni tí nkehe k'ueṭoan Dios ntá tsoñoexínni chaxín kixin chóxinni ch'án.

⁴ A ntá jnkójín nkexro ntáchro kixin chóxin Dios, a ntá titekakonhya tí nkehe tsík'etōan Dios, la mé ch'ia la noehya tí nkehe chaxín.

⁵ A ntá tí nkexro titekaon tí nkehe tsík'etōan Dios la chaxín tjuèhe Dios; mé xikaha noheni kixin chaxín jnkokoá tjejókoni ch'án.

⁶ Tí nkexro ntáchro kixin chaxín tinkáchónki Dios chrókjuak'e éxí kjuák'e Jesucristo.

Tí mandamiento nixin

⁷ Kíchóni, méxra tí nkehe tjéjjan jehya ijnko nkehe nixin tsík'etōan Dios. Náhi. Tíha mé tí nkehe k'uayéhérá tí xrankíxixín, mé tí mandamiento ósé tjen, mé tí nkehe ó tsíkinhínrá.

⁸ Kjánchó tí nkehe ikjian mé yóhe ijnko nkehe nixin, éxí kjuakoxin Cristo mé xikaha tjakoxinni, kixin tí sítie la tinkák'itjayan kixin ijie la ó t'inkaséyanxín tí xrohi chaxín.

⁹ A ntá tí nkexro tsontáchro kixin ixri tí t'inkaséyan, a ntá naxa nínkakonhen kíchó, na mé tí xikaha naxa itjen tí sítie a.

¹⁰ A ntá tí nkexro tjuèhe kíchó mé tjen tí t'inkaséyan, a ntá xikaha jina tjen, chóntahya jie la chrókjuachruèhya ch'án ninkexró kixin chrókjuasin sín jie inaá.

¹¹ A ntá tí nkexro nínkakonhen kíchó mé tjejó sín la ko ixri sín tí sítie a la ko noehya sín nketí nó sátsji sín kixin tí sítie la kjuích'éna ntakótán sín.

¹² Éxí xjanna t'ikuān tí jahará, la méxra tjéjjan tí xroon ts'ayéhérá kixin tsonohará kixin kjuachaxin ihnié Dios kjuínchetjuáxinrá tí ijiará kixin k'uenyákonhenni Ìnchéni Jesucristo.

13 Jahará it'é xjan, ikjian tí xroon ts'ayéhérá jahará ḱixin choxínrá tí nkexro tjen tí xrankíxixín. A ntá jahará ntasoírá kjaxin ikjian tí xroon ts'ayéhérá jahará ḱixin kjuachará ḱixin kjuachahya tí Jínahya chrók'uetuanhanrá.

Ikjian tí xroon ts'ayéhérá jahará chánjanrá, ḱixin choxínrá It'éni.

14 A ntá jahará it'é xjan ikjian tí xroon ts'ayéhérá ḱixin ó choxínrá tí nkexro itjen tí xrankíxixín tí naxa t'ónahya chjasintajni. Ikjian tí xroon ts'ayéhérá jahará ntasoírá, ḱixin naxa fuérterá, la ko k'uayéhérá tí itén Dios, la ko kjuachará ḱixin kjuachahya Tsochren chrók'uetuanhanrá.

15 Chrótjuèhyará tí chjasintajni la ko ni tí nkehe síin chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'éni Dios.

16 Ḱixin ninkehó tí nkehe chrókjuanjon chjasintajni chrókuixín tí tjen It'éni Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókjuich'eni, la ko tí chrókjuak'e asénni tí nkehe ts'ikonni, la ko tí kjuahnke xrikoni ḱixin itsjé nkehe chróchóntani.

17 A ntá tí chjasintajni sítinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjínhjin Dios mé ts'ejó sín jnkochŕixín.

Tí nkehe chaxín la ko tí nkehe kjuach'ia

18 Éxí xjanna t'íkuan tí jahará, la chrókónohará ḱixin ó kuichjina tí yaon tsjixixín. Jahará ó kuínhínrá ḱixin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni ḱixin ó kuichjina tí yaon tsjixixín.

19 Jehe sín tsík'axrjekjanxín sín tí tjejóni; kjánchó chaxínhya kuinkáchónki sín éxí tinkáchónkini. Náhí. Tí chaxín chrókuinkáchónki sín éxí tinkáchónkini la chrók'uaxrjekjanxínhya sín tí tjejóni, naxa chrók'uejókoni sín jnkokoá. A ntá xikaha kónhen k'uaxrjekjan sín kixin tsonoxín kixin kuinkáchónkihya sín éxí tinkáchónkini.

20 A ntá jahará la Cristo tsíkjanjon Nchakuen ch'án tsík'ayéherá kaín rá, ntá jie tiénxinrá intsí kuènte ch'án.

21 Ikjian tí xroon ts'ayéherá kixin ó nohará tí nkehe chaxín, jehya kixin chrókónoahyará; jahará la ó nohará kixin nijnko kjuach'ia tixínhya tí nkehe chaxín.

22 ¿Xá nkexro tí ch'ia? Mé tí nkexro ntáchro kixin Jesús la jehya tí Cristo. Tí nkexro a mé nínkakonhen Cristo, mé titekakonhya It'éni Dios la ko tí Xjeen ch'án.

23 A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kixin chóxin tí Xjeen Dios mé kjaxin chóxin sín tí It'é ch'án.

24 Méxra tí nkehe tsíkinhínrá tí xrankíxixín la chróxráxinkáonrá jnkochrín. A ntá xikaha tí chróxráxinkáonrá jnkochrín tí nkehe tsíkinhínrá tí xrankíxixín, la kjaxin xikaha jnkokoá chrókuinkachónkirá tí Xjeen Dios la ko tí It'é ch'án.

25 Kixin Jesucristo tsíntáchro ch'án kixin tsjanjon ch'án tí kjuachón jnkochrín.

26 Méxra xikaha tjéjian tí xroon i ts'ayéherá kixin chrókónohará kuènte tí sín tjinkaon chrókjuit'ayahará.

27 Kjánchó jahará la ó chontará Nchakuen Dios tsítjáhará Jesucristo, a ntá xíkaha la í t'ichjánxinhya kixin ókjé nkexro chrókjuakohará, kixin tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkachónkirá Cristo éxí kjuako tí Nchakuen ch'án.

28 A ntá jie éxí xjanna t'íkuan tí jahará, chrókuítóehyará chrókuinkachónkirá Cristo, kixin tió tsi ch'án la antsí chróchoxínrá ch'án la ko chrókósuàhyará chrókóchjinará tió tsi ch'án,

29 kixin ó nohará kixin Jesucristo la jína ch'án. A ntá chrókónohará kixin kaín nkexro jína la xjeen Dios tíha.

3

Tí sín xjeen Dios

1 Chrókónohará kixin It'éni Dios, imá tjuèhe tí jeheni kixin nchek'in ch'án xjeen ch'án tí jeheni, la mé chaxín jeheni tíha. Mé xíkaha tí sín chjasintajni chónhya sín tí jeheni kixin jehe sin la xráxín chónhya sín Dios.

2 Mé xíkaha kíchó ni, ó tsík'ónani xjeen Dios, a ntá naxa tjakoxinhya ch'án nkehe tsonhenni tí tsjixixín. Kjánchó ó noheni kixin tió itsi Ìnchéni Jesucristo la ts'ónani éxí tí jehe ch'án, kixin ts'ikonna kixin nkexrí tjen tí jehe ch'án.

3 A ntá kaín nkexro tjejóchónhen tí tsi ch'án la chrókuítóhe sín ijíé sín kixin tsotjóá sín kixin jehe ch'án la tjóá ch'án.

4 Kíxin kain tí nkexro tjasin jie mé jínahya ch'e sín, kíxin tíó tjasin chojni jie la mé xíkaha kuítekakonhya sín tí ley a.

5 Jahará ó nohará kíxin Jesucristo kui chjasintajni kíxin tsjatsen ch'án tí ijíeni, a ntá jehe ch'án la ninkehó jie chóntahya ch'án.

6 Mé xíkaha kaín tí sín chaxín tinkáchónki tí jehe ch'án la mé tjasinhya sín jie; a ntá kain tí sín tinkákjasin jie la tsík'ikonhya sín ch'án la ko xráxín chónhya sín ch'án.

7 Éxí xjanna t'íkuan tí jahará; méxra chrókuítóéhyará kixin ninkexró chrókjuít'ayahará; a ntá tí nkexro ch'e nkehe jína la jína ch'án, kíxin Ìnchéni la jína ch'án.

8 A ntá tí nkexro xritjasin jie la mé kuènte tí Jínahya; kíxin tí Jínahya mé kjuankíxin kjuasin jie desde tí xrankíxixín k'óna chjasintajni. Méxra tí Xjeen Dios mé kui chjasintajni kíxin sinchek'itjáyan ch'án kaín tí xra kjuích'e tí Jínahya.

9 Nijnko tí chojni tsík'axrjeníxin Dios naxa chrónkákjasin jie, kíxin ó chóna tí kjuachón kjuanjon Dios; la í xitjahya naxa chrókjuasin jie kíxin ó tsík'óna xjeen Dios.

10 Mé xíkaha tónoxín kíxin nkexro tí xjeen Dios la ko nkexro tí xjeen tí Jínahya, kíxin tí nkexro ch'ehya tí jína la ko tjuèhya kíchó mé jehya xjeen Dios tíha.

Chrójuèheni kíchó ni

11 Méxra tí tan tsíkinhínra tí xrankíxixín mé tíhi, kíxin chrójuèheni kíchó ni.

12 Chrókjuích'ehyani éxí kjuích'e ch'ín Caín, kíxin jehe ch'án mé kuènte tí Jínahya, kíxin k'óyán ch'án tí kíchó ch'án. ¿Nkekuènte kíxin k'óyán ch'án? Kíxin tí

ch'ín Caín la tí nkehe jínahya kjuích'e ch'án, a ntá tí kíchó ch'án la kjuích'e ch'án tí nkehe jína.

¹³ Kíchóni, chróchrakonhyará tí nínkakonhanrá tí sín síin chjasintajni.

¹⁴ A ntá noheni kixin k'uat sínkani tí kjuach'én, a ntá kjuachón, mé noexínni tíhi kixin tjuèheni kíchó ni. Tí nkexro tjuèhya kíchó la éxí tsík'en sín xíkaha xritjejó sín.

¹⁵ Kaín tí nkexro imá nínkakonhen kíchó na mé chojni tjàya tíha, la ko ó nohará kixin ijnko chojni tjàya la xitjahya tsochónta kjuachón jnkochrín.

¹⁶ Ó noheni kixin nkexro tí tjuèheni, kixin Ìnchéni Jesucristo mé k'uenyákonhenni ch'án; kjaxin jeheni kjónté chrók'uenyákonhenni tí sín kíchó ni.

¹⁷ A ntá tí tjen ijnko nkexro rico t'ikon kixin ijnko tí kíchó ch'án t'ichjánxínhin nkehe, a ntá tí tsjinkítsahya tí kíchó, ¿a ntá nkexrí chrótjuèhe ch'án Dios kaín asén ch'án?

¹⁸ Éxí xjanna t'íkuan tí jahará, méxra chrótjuèxínhyani tí kíchó ni tí tan náxrjón chrónixjani ó. Náhi. Chrókjuakoxinni tí nkehe jína chrókjuich'eni.

Jína tsochjineheni tí tjen Dios

¹⁹ Tíha mé noexínni kixin chaxín ntoá tjejóni, a ntá chrókónoheni kixin chaxín tjejóni éxí tjinkaon Dios.

²⁰ A ntá tí tjoni asénni kixin chóntani ichrén jie, a ntá Dios la imá nohe ch'án la nohe ch'án kaín nkehe tónhen asénni.

²¹ Mé xíkaha kíchó ni, tí tjohya asénni kixin naxa ichrén nkehe jínahya tjenkayáxinni, a ntá antsí jína tsochjineheni tí tjen Dios,

22 a ntá jehe ch'án tsjanjon ch'án kaín nkehe tsjancheheni ch'án, kixin nchexiteyéheni tí nkehe k'uetoan ch'án la ko ch'eni tí nkehe tóxrjnhin ch'án.

23 Tí nkehe tsík'etoan ch'án la mé tíhi kixin chrókuitekaonni tí Xjeen ch'án Jesucristo, la ko chrótjuèheni kichó ni éxí k'uetoan ch'án.

24 Tí nkexro nchexiteyéhe tí nkehe k'uetoan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kixin jehe ch'án tjejókoni ch'án kixin tí Nchakuen ch'án tsíkjanjon ch'án.

4

Tí Nchakuen Dios la ko tí nchakuen tí nkexro nínkakonhen Cristo

1 Kichóni, chrókuitekákonhyará kaín tí sín ntáchro sín kixin Nchakuen Dios mé nixjaxin tí jehe sín. Náhí. Chrótsjehérá tí nkehe ch'e sín kixin chrókónohará kixin á chaxín chóna sín Nchakuen Dios o náhí, kixin tí chjasintajni la ixri nchónhya chojni ch'ia, ntáchro sín kixin nixja sín tí itén Dios.

2 A ntá xikaha mé chrókónoaxínrá kixin á chaxín chóna sín Nchakuen Dios kixin kaín tí sín chaxín titekaon sín kixin Jesucristo ikui éxí chojni mé chóna sín Nchakuen Dios.

3 A ntá tí nkexro titekakonhya kixin xikaha tsíki Jesús, na chóntahya sín Nchakuen Dios. Náhí. Chóna sín tí nchakuen tí nkexro nínkakonhen Cristo. Jahará ó kuínhínrá kixin itsi tí nchakuen a, a ntá jie ó tsíki chjasintajni.

4 T'íkuan tí jahará éxí xjanna, kixin jahará la ó titekáonrá Dios, a ntá kjuachará kixin kjuachahya tí sín ch'ia chrók'uetoan, kixin tí nkexro tjejókoará

la imá t'etoan, a ntá tí nkexro t'etoan chjasintajni la kánhyó t'etoan.

⁵ Kíxin jehe sín la kuènte chjasintajni ó, méxra nixja sín tí nkehe kuènte chjasintajni ó. A ntá tí chojni kuènte chjasintajni ó mé tjejótinhin sín.

⁶ A ntá jeheni mé xjeen Dios. A ntá tí sín chóxin Dios mé tjejótinhin sín tí nkehe tjakoni. A ntá tí nkexro chónhya Dios mé tjinkakonhya sín chrókuinhin sín tí nkehe tjakoni. A ntá tíha mé tjatsoanxínni nkexro chónhta tí Nchakuen tí nkexro chaxín la ko nkexro chónhta tí nchakuen tí nkexro xrich'ia.

Dios mé tjuèheni

⁷ Kíchóni, méxra chrótjuèheni kíchó ni, kíxin tí tjuèheni kíchó ni mé tixín tí tjen Dios. Kaín nkexro tjuèhe kíchó mé xjeen Dios, la ko chóxin Dios.

⁸ A ntá tí nkexro tjuèhya kíchó na mé chónhya Dios kíxin Dios la xráxín tjuèhe chojni.

⁹ Dios la ó kjuakoxín ch'án kíxin tjuèhe tí jeheni kíxin tsíchr'án ch'án tí jnkokoá Xjeen ch'án chjasintajni kíxin tsochóntaxínni kjuachón tí jehe ch'án.

¹⁰ A ntá tí tjuèheni Dios la mé tíhi: jehya kíxin jeheni k'uetjuèheni tí jehe ch'án. Náhi. Jehe ch'án mé xráxín tjuèhe ch'án tí jeheni, a ntá ichr'án ch'án xjeen ch'án k'uenyákonhenni kíxin tsotjuáxin tí jie chóntani.

¹¹ Kíchóni, a ntá tí xikaha Dios tjuèhe tí jeheni, a ntá kjaxinni jeheni xikaha chrótjuèheni kíchó ni.

¹² A ntá Dios la ninkexró k'uikonyha. Kjánchó tí chrótjuèheni kíchó ni la Dios ts'ejókoni ch'án, a ntá tsjinkitsa ch'án kíxin chaxín tsotjuèheni kíchó ni.

13 Tíhi mé noexínni ḱixin tjejókoni Dios la ko jehe ch'án tjejóko tí jeheni ḱixin tsíkjanjon ch'án tí Nchakuen ch'án chóntani.

14 Jeheni mé k'uíkoxín konni la mé chrónkaxínni ḱixin It'éni Dios tsíchr'án ch'án Xjeen ch'án ḱixin tsaáxin chojni síin chjasintajni.

15 A ntá jnkójín nkexro titekaon la ko chrónkaxín ḱixin Jesús mé Xjeen Dios mé tjejóko Dios la ko Dios mé tjejóko tí jehe sín.

16 Mé xíkaha mé noexínni la ko titekaonni ḱixin Dios la tjuèhe tí jeheni. Dios mé xráxín tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín.

17 Mé xíkaha chaxín chrótjuèheni Dios ḱixin ntá chróchrakonhyani tí yaon tsitoexín ijíeni ḱixin ó noheni ḱixin Jesucristo la tjuèheni ch'án la ko jeheni la kjaxin tjuèheni tí jehe ch'án.

18 Ḱixin tí tjuèheni Dios la kohya kjuachrakon. Tí chaxín tjuèheni Dios la tíha mé tsakitsje tí kjuachrakon. A ntá chojni chrakon mé chaxín tsjasóte. A ntá jnkójín chojni chrakon la mé chaxínhya tjuèhe Dios.

19 A ntá jeheni la tjuèheni Dios ḱixin jehe ch'án senó tjuèhe ch'an tí jeheni.

20 A ntá jnkójín nkexro ntáchro ḱixin jehe mé tjuèhe Dios, a ntá tuénxín nínkakonhen kíchó mé kjuach'ia xriko. Tí tjuèhya ch'án tí kíchó chóxin ch'án, la kjaxin xitjahya tsotjuèhe Dios ḱixin tsík'íkonhya ch'án Dios.

21 Tíhi mé tsík'etōan Jesucristo ḱixin tí nkexro tjuèhe Dios la mé kjaxin chrótjuèhe kíchó.

5

Tí tinkáchónkini Dios la tsjachahya tí chjasintajni

¹ Kaín nkexro titekaon kixin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a.

² A ntá tí tjuèheni Dios la ko nchexiteyáni tí nkehe t'et̄oan ch'án, a ntá noheni kixin kjaxin tjuèheni tí sín tsík'óna xjeen Dios.

³ Tí tjuèheni Dios la t'ichjánxin kixin chrókuitekaonni tí nkehe k'uet̄oan ch'án, kixin ti nkehe t'et̄oan ch'án la jehya ijnko nkehe imá xra

⁴ kixin kaín chojni tsík'óna xjeen Dios tsjacha, la ntá tí chjasintajni la náhí. A ntá tí tinkáchónkini Ìnchéni la mé tsjachaxinni la tsjachahya tí chjasintajni.

⁵ A ntá tí sín tinkáchónki kixin Jesús mé tí Xjeen Dios mé tsjachahya tí chjasintajni ts'et̄uēnhen sín.

Tí nkehe chrónkaxín nkexrí tjen tí Xjeen Dios

⁶ Tió kui Jesucristo la kjuakoxin tí ìnt̄a la ko tí jni. La jehya kixin jehó tí ìnt̄a kjuakoxin ch'án. Náhí. Kjaxin ìnt̄a la ko ijni kjuakoxin ch'án. A ntá tí Nchakuen Dios mé chrónkaxín tíha, kixin tí Nchakuen Dios la chaxín ntoá.

⁷ Siín iní nkexro chrónkaxín nkaya nkajni: ijnko la It'éni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha.

⁸ A ntá siín iní tí nkehe chrónkaxín ntihi chjasintajni, mé tí Nchakuen Dios, la ko tí ìnt̄a la ko tí jni; a ntá tí iní mé jnkokón chrónka.

⁹ ¿Á chrókuitekaonni tí nkehe chrónka chojni ó? A ntá tí nkehe tsíchrónka Dios, a_{nt}sí má tjetaon kixin táha la Dios tsíchrónkaxín kixin nkexrí tjen tí Xjeen ch'án.

¹⁰ Tí nkexro titekaon tí Xjeen Dios na mé a_sén ó tónoexín tíha. A ntá tí sín titekakonhya sín Dios, la ntáchro sín kixin Dios la ch'ia ch'án kixin kuítেকakonhya sin tí nkehe tsíntáchro Dios kixin nkexrí tjen Xjeen ch'án.

¹¹ Tí nkehe tsíchrónka Dios mé tíhi kixin tsjanjon ch'án kjuachón jnkochrín, a ntá tí kjuachón mé chón_ta tí Xjeen ch'án.

¹² A ntá tí nkexro chón_ta tí Xjeen Dios mé kjaxin chón_ta kjuachón; a ntá tí nkexro chón_tahya tí Xjeen Dios la mé chón_tahya kjuachón.

Chrónkaxín nkehe kuènte kjuachón

¹³ Tí nkehe mé kjinni kixin jahará ó títékáonrá tí Xjeen Dios, kixin mé tsonoaxínrá kixin chaxín chontará kjuachón jnkochrín.

¹⁴ Tíhi mé chóxixínni Dios kixin noheni kixin ichrén nkehe tsjancheheni ch'án éxí tjinkaon ch'án la jehe ch'án la tsinhin ch'án.

¹⁵ A ntá tí xikaha ó noheni kixin Dios tjetinhin tí nkehe nixjeheni ch'án, a ntá kjaxin ó noheni kixin ó chón_ttani tí nkehe kjuancheheni ch'án.

¹⁶ A ntá jnkojín_rá ts'ikonrá ijnko kichuárá tjasin jje, a ntá tí jehya ijnko jje chrók'uenxín ch'án, la chrókjuancheherá Dios kixin chrókjuinchexraxinkaon ch'án kixin kjuasin ch'án jje, a ntá Dios chrókjuanjon ch'án kjuachón, tí chaxín jehya ijnko jje chrók'uenxín chojni. A ntá tí jje chrók'uenxín

chojni la ntáxrjan ḱixin íchá j́ina chrókjuanchehyará Dios ḱixin chrókjuinkítsa tí ch'ín a.

¹⁷ Kaín nkehe j́inahya la ijje tíha. Kjánchó siín jie ts'enzínhya chojni.

¹⁸ Ó noheni ḱixin tí nkexro tinkáchónki It'éni Dios tjasinhya sín jie, ḱixin tí Xjeen Dios tjinkítsa tí jehe sín, a ntá tí J́inahya tsjachahya tsjachroe tí jehe sín.

¹⁹ Ó noheni ḱixin Dios t'ayakonhen tí jeheni, a ntá tí J́inahya chóna kjuachaxin t'etuenhen kuenté chjasintajni.

²⁰ Ó noheni kjaxin ḱixin Xjeen Dios kui, la ko kjuínkítsa ch'án tí jeheni ḱixin chrókónoheni nkexrí tjen Dios chaxín. A ntá tjejókoni jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochrín.

²¹ Éxí xjanna t'íkuḡn tí jahará, la títohérá tí dios tsíkjanoya. Amén. Ó tjen.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b9b09122-b3f6-59f0-9594-749907b32b5b